



IN MEMORIAM

**DR. MEHO (AHMETA) BAŠIĆ,
1946.–2010.**

Dana 12. februara 2010. godine preminuo je naš prijatelj, drug, bosanskohercegovački rodoljub – Meho Bašić, redovni profesor na Ekonomskom fakultetu Univerziteta u Sarajevu i član redakcije univerzitetskog časopisa *Pregled*. Preselio je, kako muslimani kazuju, u bolji svijet u 64. godini.

Profesor Meho Bašić, sin Ahmeta i Mevke, rođen je 1. septembra 1946. godine u Domanovićima, općina Čapljina. Studirao je na Ekonomskom fakultetu Univerziteta u Sarajevu gdje je diplomirao 1969.

Postdiplomski studij nastavio je na Sveučilištu u Zagrebu gdje je 1977. godine na Ekonomskom fakultetu odbranio magistarski rad na temu „Makroekonomska analiza investicija u BiH“. Na Ekonomskom fakultetu u Sarajevu 1983. odbranio je doktorsku disertaciju pod naslovom „Investicije kao faktor ekonomskog razvoja BiH“.

Započeo je znanstvenu karijeru kao asistent i znanstveni saradnik na Ekonomskom institutu u Sarajevu. Predavao je na Ekonomskom fakultetu Univerziteta u Sarajevu – bio je profesor na Katedri za ekonomsku teoriju i politiku, na predmetu Uvod u ekonomiju. Predavao je, također, Ekonomiku javnog sektora. Od 1986. do 1990. bio je profesionalno angažiran u Predsjedništvu SRBiH i Predsjedništvu CKSKBiH na poslovima rukovoditelja Sektora za društveno-ekonomske odnose i razvojnu politiku. Profesor Bašić je, dakle, bio aktivan u društveno-političkom radu, u brojnim poslovima za opće dobro građana našega društva i prije i poslije rata 1992.–1995. godine. Profesor Bašić dobitnik je Ordena rada sa srebrenim vijencem. Bio je član Ekonomskog savjeta Federacije BiH, član Predsjedništva Saveza ekonomista BiH, član

redakcije Ekonomskog glasnika, član redakcije časopisa *Ekonomska analiza*, član Predsjedništva SKBiH, član Predsjedništva SDPBiH i Predsjednik Ekonomskog savjeta SDPBiH.

Profesor Bašić objavio je nekoliko udžbenika i knjiga, sudjelovao je na više naučnih skupova u BiH i inozemstvu te znatno doprinio školovanju diplomiranih ekonomista. Pisao je za mnoge časopise i dnevne novine u BiH i okruženju. Učestvovao je na brojnim znanstvenim skupovima u BiH i inozemstvu kao respektabilan interpretator ekonomskih problema. Napisao je između ostalog sljedeće značajne knjige: *Investicije i privredni razvoj BiH* (1984), *Efikasnost investicija i privredna struktura BiH* (1985), *Kako praviti biznis u BiH* (1997), *Analiza razvoja javnog sektora u BiH* (1998), *BH ekonomija u kliničkoj smrti* (1998), *Ekonomija javnog sektora* (2004), *Ekonomija BiH. Teorija i empirija* (2005) i *Osnove ekonomije*, s Esadom Vilogorcem (2008).